

M112: Die Hochzeit

0,1 Nv mugent ir horen zellen
0,2 uon einem heren spelle .
0,3 umbe einen chunich richen .
0,4 umbe manich schone zeichen .
0,5 da michil sin an stat .
0,6 gesach in got der ez begat .
0,7 Swer div zeichene wil began .
0,8 der sol guoten list haben .
0,9 also der smit uil guot .
0,10 die wiere in daz golt tuot .
0,11 daz insigele er fur leit .
0,12 als er z gelernt hat
0,13 de iz vil herlichen stat .
0,14 unde niht zergat .
0,15 Die urowen zieret daz golt .
0,16 uon div ist si im holt
0,17 Div ist nie so here noch so riche .
0,18 si treit an barer liche
0,19 die bovge ioch daz uingerlin .
0,20 wie mag iz ir lieber sin .
0,21 Siv spannet fur ir bruste .
0,22 daz ist geworht mit listen .
0,23 ain guldin gewiere .
0,24 daz ez ir den lip ziere .
0,25 daz golt ir wol ane stat .
0,26 wan si schone da mit gat .
0,27 Chumet ir danne unheil .
0,28 daz si des ulivset ein teil .
0,29 ob iz danne auir ist .
0,30 geuallen in den mist .
0,31 so suochet si spate unde uruo .
0,32 mit den si getrovwet dar zuo .
0,33 so si sin danne niht eruert .
0,34 den mist si fur die ture cheret .
0,35 dar undir daz golt .
0,36 dem si e was holt .
0,37 si laet ez noten uarn
0,38 si ne mage ez nimmir bewarn .

0,39 uor dem unreinen miste .
0,40 da mugent ir lernen liste .
0,41 swelhir so welle .
0,42 uon einem heren spelle .
0,43 Swer den wistuom treit .
0,44 unde er in nieman seit .
0,45 unde in nieman leret .
0,46 swa er hin cheret .
0,47 der bezeichent daz golt . daz begraben ist .
0,48 tieffe undir den mist .
0,49 daz der mist ubirgat .
0,50 unde ez niht schinen lat .
0,51 Der man bezeichent den mist .
0,52 wan er got leit ist .
0,53 den man fur daz hoves chert .
0,54 also wirt er geschert .
0,55 uon der himelischen porte .
0,56 mit dem gotesworte .
0,57 daz er z hie uerderbet hat .
0,58 hei wie hohe ez in gestat .
0,59 Swen got so geeret .
0,60 daz er in den wistuom geleret .
0,61 der schol in den zeigen .
0,62 die sin niuwen eigen .
0,63 oder er nimt es ubir sich .
0,64 uil starchen gerich .
0,65 Aan den buochen daz geschriben stat .
0,66 wie disiv werlt zergat .
0,67 die heimuote die wir hie han .
0,68 die muozzen wir uerlan .
0,69 Eez wirt hie allez uerwandelot .
0,70 wan div heiligen goteswort .
0,71 div muozzen elliv ergan .
0,72 als si got ie chunt hat getan .
0,73 daz si wip oder man .
0,74 swer div wol uernemen chan .
0,75 unde si gerne wil erfullen .
0,76 mit werchen ioch mit willen .
0,77 zuo dem sint si wol gewendet .
0,78 da sint si niht geschendet .
0,79 Odin . prodit . losait . Boshait .
0,80 dem ist daz goteswart .. leit .
0,81 daz muoz allez samt sin
0,82 in der gotes abulgin .
0,83 Tunchil ist div goteschraft .
0,84 ubir alle heidenschaft .
0,85 daz si tovfte habent uerchorn .
0,86 des sint si alle uerloren .

0,87 daz si niht gelovbent an got .
0,88 daz er wart gemarterot .
0,89 des muozzin si sin .
0,90 immir in der uinsterin .
0,91 Swer die tovffe hat enphangen .
0,92 dem waere ez wol ergangen .
0,93 wolde er div dinch began .
0,94 div da zuo schulen gestan .
0,95 der solt haben ein reht .
0,96 also wilen habete ein guot chneht .
0,97 unde ein erlich maget .
0,98 daz sol iv werden gesaget .
0,99 wir schulen die alten e uerberen .
0,100 unde schulen die niwen bewaren .
0,101 Div maget und der guote chneht .
0,102 die wrben umbe daz reht .
0,103 Eer ist ein guot chneht .
0,104 der da minnet daz reht .
0,105 der ist niht guot chneht .
0,106 der da habet unreht .
0,107 swie uil man in geleret .
0,108 daz er sich niht becheret .
0,109 der bezeichent den hunt . der da wuotet .
0,110 der sin selbes nine huotet .
0,111 der bizzet den man .
0,112 wan er andirs nine chan
0,113 wan er mit der tobesuhte winnet .
0,114 unz er den tot gewinnet .
0,115 also tuont alle die da varnt
0,116 die des rehtes niweht warent .
0,117 die uehtent ane guote .
0,118 mit ubirmuote .
0,119 begriffet si also der tot .
0,120 ne werdent si niht gebezzrot .
0,121 die sterbent in der tobeheit .
0,122 des choment die sele in arbeit .
0,123 daz sint die rehten hellezagen .
0,124 daz lat iv nieman widirsagen .
0,125 er ist ein chneht .
0,126 der da minnet daz reht .
0,127 der ist wol berihtet .
0,128 swenne er sich erfihet .
0,129 so uerre dort undere .
0,130 uon dem tieffen abgrunde .
0,131 swenne er sich des erwert .
0,132 daz er dar nine uert .
0,133 der dar niht wirt braht .
0,134 der habet sich wol bedaht .

0,135 der ist wigant .
0,136 widir sinen uiant .
0,137 der zaeme uns ze lobene .
0,138 z einem rehten degene .
0,139 der mach urolichen uaren .
0,140 in des herren Abrahams baren .
0,141 da wirt im leben uerlazzen .
0,142 des wirt er niht bestozzen .
0,143 der ist mit guotem ruome .
0,144 chomen ze sinem hertuome .
0,145 Da uernemet rehte wie ez gat .
0,146 in den maeren meregarten stat .
0,147 daz in daz apgrunde gat .
0,148 ein uil hoch gebirge .
0,149 de ist ein michil sorge .
0,150 gar ubir allez ermezzen .
0,151 daz hat ein wirt besezzen
0,152 da ne mach nieman ovf chomen wan
0,153 der den sich hat genomen .
0,154 an dem alten valande .
0,155 dem unserem uiande .
0,156 Da zoch sich bi alten ziten .
0,157 ein herre mit sinen lovten .
0,158 der herre . lebe rehte .
0,159 der habete uil chnehte .
0,160 er lehe in allen den rat .
0,161 des er uil guot stat hat .
0,162 sumelich sine heriste chnehte .
0,163 die wrben niht rehte .
0,164 die rieten an sin ere .
0,165 des enkulten si uil sere .
0,166 Do was undir dem gebirge .
0,167 ein uil michil sorge .
0,168 ein tieffir charchaere .
0,169 der stuont alle wile laere .
0,170 des habeten entrische lovte uergezzen .
0,171 der was mit wrmen besezzen .
0,172 dar undir swief der herre .
0,173 sine ungetriwe chnehte uerre .
0,174 da ne habeten si niht ze dem lebene .
0,175 wan daz im die wrme heten ze gebene .
0,176 Daz gewrme ungehivre .
0,177 daz cholete si mit fivre .
0,178 uon den eren si chomen .
0,179 div fivrinen bant si namen
0,180 daz meiste wndir do geschach .
0,181 daz ie dehein man gesach
0,182 die die wrme da choleten .

0,183 unde die die martere doleten .
0,184 daz si einen anderen anderen rieten .
0,185 daz si widir ir herren hulden getaten .
0,186 daz si ir herre uerswief .
0,187 in daz appgrunde tief .
0,188 starche rach er sinen zorn .
0,189 da habete er si alle uerlorn .
0,190 Do was er do bi den ziten .
0,191 mit anderen lovten .
0,192 die er haben solde
0,193 er stifte al daz er wolde .
0,194 Do was do ein vil tief tal .
0,195 eines lustammes also uol .
0,196 Do wart geborn undir der diete .
0,197 ein maget guote .
0,198 uzzer einem edelen chunne .
0,199 der was gare elliv wne . der
0,200 was gare alliv ere .
0,201 die gewan nie maget mere .
0,202 div habet alle guotin .
0,203 die rehten diemuotin .
0,204 ir uarwe was ir also lieht .
0,205 ia ne wart nie so erliches niht .
0,206 die ureischot do der herre .
0,207 ovf dem gebirge uil uerre .
0,208 Do chom im do in sinen muot .
0,209 daz im div maget waere guot .
0,210 do wolde do der guote chneht .
0,211 gehiwen umbe daz reht .
0,212 daz er einen erben uerliezze .
0,213 den nieman sines riches bestiezze .
0,214 der mohte sin ein chunich ane sorgen .
0,215 ubir dei telir unde ubir die berge .
0,216 Einen boten habete er algar .
0,217 ze stete sande er in dar .
0,218 er gert ir ze wibe .
0,219 ze sinem libe .
0,220 do ir div botschaft wart gesaget .
0,221 do gelobte ez div maget .
0,222 ir urivnt guote .
0,223 gerieten ez so drate .
0,224 do beuestente si der guote chneht .
0,225 so was gewonlich unde reht .
0,226 er gap ir sin vingerlin
0,227 daz was rehte gemahelin .
0,228 eines tages wrden si enein
0,229 daz er si wolde holen heim .
0,230 ir urivnde guote .

0,231 die habeten si mit huote .
0,232 daz si indir niht taete .
0,233 daz si an ir eren iht gemuote .
0,234 si mohten si uil lihte bewarn .
0,235 si ne wolde doch niemmir misseuaren .
0,236 Div michele huote .
0,237 umbe die maget vil guote .
0,238 div bezeichent daz mennisch guot
0,239 daz hat michil not .
0,240 unz an sinen tot .
0,241 daz ez sich selbe wol bewar .
0,242 daz im der uiant nindir widiruar .
0,243 daz er z sines guoten willen nine wende
0,244 unde ez an guoten werchen nine schende .
0,245 Einen boten habte er algar .
0,246 ze stet sande er in dar
0,247 mit siner manunge .
0,248 fur die brovt iunge .
0,249 daz si niht entwalte .
0,250 ob si dar wolte .
0,251 si ulizzete sich ir waete .
0,252 die si ane haete .
0,253 daz si zaeme sinem livte .
0,254 uil wol zuo einer brovte .
0,255 do ir div botschaft wart gesaget .
0,256 do ulizzet sich div maget .
0,257 baz ir waete .
0,258 danne si e haete .
0,259 Do der tach do wart .
0,260 daz er solde uaren an die uart .
0,261 nach Siner schonen brovte .
0,262 do gewan er uil livte .
0,263 rittere gemeite .
0,264 uil wol bereite .
0,265 michil hereschare .
0,266 er chom chunechlichen dare .
0,267 do si do fuoren an die uart .
0,268 unde der livt gesamenet wart .
0,269 do nam er under der menegin .
0,270 die allertivrist solde sin .
0,271 div heresten lute .
0,272 unde sande si nach der brovte
0,273 unde enbot dem wirte .
0,274 uon der sinen uerte .
0,275 ob si dar wolten .
0,276 daz si niht en twalten .
0,277 do dem wirte div botschaft do wart gesaget .
0,278 do ilte er gaerwen die maget .

0,279 er badet si mit ulizze .
0,280 in gewaete daz wizze .
0,281 mit porten behangen .
0,282 mit guldinen spangen .
0,283 die guldinen wiere .
0,284 fur die maget here .
0,285 So diu maget da her fur giench .
0,286 unde si den herren enphiench .
0,287 si was geberht unde lieht
0,288 ja ne waere nie so herliches niht .
0,289 do stuont div maget guote
0,290 uor allem dem livte .
0,291 an alle missetaete
0,292 si zam wol z einer brovte .
0,293 die hant bot er ir dare
0,294 er gereit ze uordirst an der
0,295 schare . mit siner sconen brovte .
0,296 uor allem dem livte .
0,297 da si fuor in der vare
0,298 si lovhte ubir alle die schare .
0,299 als ein liehtir tagesterne .
0,300 do leiten si si gerne .
0,301 Do riten mit der brovte .
0,302 chindische lovte .
0,303 riter gemeite .
0,304 herlich gereite .
0,305 hoy wie si do sungen .
0,306 do si sie heim brungen .
0,307 heime waren lovte .
0,308 die wartoten der brovte .
0,309 si enphiengen si mit rate .
0,310 mit alleme guote .
0,311 die e da heime waren .
0,312 die wirtschaft si uerbaren .
0,313 die nuzzen si mit den gesten .
0,314 mit aller slahte lusten .
0,315 Do chomen mit der brovte
0,316 hermuoede lovte .
0,317 die trunchen des lides .
0,318 unde ergazzeten sich alles leides .
0,319 Dar chom des liv.tes ein michil chraft .
0,320 da was div beste wirtschaft .
0,321 die der ie dehein man .
0,322 ze sinen brovtlovften gewan .
0,323 wande si die nuzzen .
0,324 die ir e nine enbizzen .
0,325 Nu sol iv werden gesaget .
0,326 allerste uon der maget .

0,327 uon der brovte .
0,328 unde uon allem dem livte .
0,329 unde uon dem wirte .
0,330 der si alle dar brahte . in uerte .
0,331 div michel wirtschafft .
0,332 div bezeichent die maeren goteschafft .
0,333 daz got allez daz bestellet
0,334 als im selben geuellet .
0,335 in dem himele und uf der erde .
0,336 dei z immir war werde .
0,337 e hat er s ime erdaht .
0,338 unde hat ez allez furbraht .
0,339 Daz der brutegom dar chome .
0,340 unde die brovt zuo im nam
0,341 daz bezeichent allermeiste .
0,342 den heiligen geiste .
0,343 der in daz mennisch chumet .
0,344 da ez mit weinen ende genimit .
0,345 da mit wirt ez gelebente in got .
0,346 swenne er uon im scheidet . so lit ez tot .
0,347 die michelen ere .
0,348 die bezeichent noch mere .
0,349 div herlichen dinch .
0,350 div treffent an daz wenige chint .
0,351 daz div muotir da gebirt .
0,352 unde ez got gemahet wirt .
0,353 so bezeichent daz uingerlin .
0,354 den westerhuot sin .
0,355 den daz chint ovffe hat .
0,356 als ez ze iungist erstat .
0,357 unde ovch div gotes gemahlin .
0,358 immir ewich schulen sin .
0,359 Daz er den boten habete algare .
0,360 unde er in so diche sande dare .
0,361 mit siner manunge .
0,362 fur die brovt iunge .
0,363 daz bezeichent unsir furboten .
0,364 zuo dem almaechtigen gote .
0,365 daz ist der ewarte .
0,366 mit dem gotes warte .
0,367 in dem chore
0,368 uor dem urone altare .
0,369 da ist div sine zunge .
0,370 div rehte mannunge .
0,371 daz buoch daz da geschriben stat .
0,372 daz saget den richtuom unde den rat .
0,373 den der brovtegovm hete .
0,374 als uns der bote seite .

0,375 Die urivnde an dem rate .
0,376 daz sint die tovgen guote .
0,377 wan si uns helfent bringen .
0,378 zuo den christenlichen dingen
0,379 Daz si fuoren an die uart .
0,380 unde der liut gesamenet wart .
0,381 unde er die tivristen liute
0,382 sande nach der brovte .
0,383 die bezeichent den tach
0,384 den uns sande der wol mach .
0,385 ubir arme unde riche .
0,386 uil harte chreftichlichen .
0,387 da al gescefte zuo dinget .
0,388 daz disiv werlt bringet .
0,389 der beschinet ubil unde guot .
0,390 daz tuot er allez ane not .
0,391 der tach ist gemeine .
0,392 der beschinet niemaen eine .
0,393 dehein herre ist so riche .
0,394 er beschine den armen also minnechlichen .
0,395 also tuot der rehte unde der guote .
0,396 der uerwizzet nieman sine missetaete .
0,397 der bezzerot in swa so er mach .
0,398 der bezeichent den tach .
0,399 Sit uns so minnet der tach .
0,400 der uns wol gehelfen mach .
0,401 engegen dem schulin wir ovf stan .
0,402 ze gotes dienste gan .
0,403 wir schulen daz niht lazzen .
0,404 wir ne bieten uns im ze fuozzen .
0,405 dem herren der da wol mach .
0,406 der uns sande den tach .
0,407 Osten uns zuo gat .
0,408 aller lust unde aller rat
0,409 .osten schulen div westirbarn .
0,410 in daz himelrich uarn .
0,411 unde anderiv div chint .
0,412 div got diene sint .
0,413 div des morgens choment .
0,414 unde grozzen lon nement .
0,415 die habent sich gewarnot .
0,416 allen den arnot .
0,417 swelich wetir si begat .
0,418 so ist geschaffen ir rat .
0,419 undir dem livte .
0,420 die sich becherent an der zite
0,421 Westent choment die under none
0,422 die sich becherent schone .

0,423 die helfent rivten
0,424 den erren mietlivten .
0,425 mit werchen ioch mit worten
0,426 in dem urone wingarten .
0,427 die wervent rehte ir dinch .
0,428 den git got den phenninch .
0,429 junch oder alte .
0,430 unz er des libes walte .
0,431 So gahent si harte
0,432 zuo der himelischen porte .
0,433 die enphahit da der riche .
0,434 alle geliche .
0,435 uersovmet er daz eine tor .
0,436 so ist er immir da uor .
0,437 Daz sint div uier ente .
0,438 dei haben wir an der hente .
0,439 die himelischen porte .
0,440 die sint bewart harte .
0,441 Der ende der sint uiere .
0,442 daz gesteine ist also here .
0,443 der steine allir iegelich .
0,444 treit ein licht also erlich .
0,445 widir den andiren besundir .
0,446 daz ist ein michil wndir .
0,447 so ne livhte nie so schone .
0,448 der sunne noch der mane .
0,449 noch der sternnen dehein .
0,450 nie so rehte en schein .
0,451 der neheines licht .
0,452 trifftet her zuo niht .
0,453 so die steine lovhtent harte .
0,454 in der himilischen porte .
0,455 alliz gemeine .
0,456 lebentiz gesteine .
0,457 daz lovhtet dar inne .
0,458 da mit zimberot got der riche .
0,459 al sin himelriche .
0,460 Der estrich ist guldin .
0,461 wie moht er erlichir sin .
0,462 dar inne sizzet der magen .
0,463 uon dem wir ie horen sagen .
0,464 osteret becheret .
0,465 der uns alle hat geleret .
0,466 uon im schinet daz lieht .
0,467 ia ne wart nie so erliches niht .
0,468 div wnne die er an im hat .
0,469 div chraft div uon im gat .
0,470 mit waltunder hende .

0,471 der genimet nimmir ende .
0,472 an deme wirt wol schin .
0,473 daz er ein herre wil sin .
0,474 der ubiral si uf habente .
0,475 daz ie wart lebente .
0,476 an siner gehuhte
0,477 sint daz mer ioch die lufte .
0,478 elliv apgrunde
0,479 unde daz ist dar undere .
0,480 er phliget uinstir und lieht
0,481 ane in ist niht .
0,482 Daz alle die lovte .
0,483 gahoten uor der brovte .
0,484 also solten wir alle geliche .
0,485 gahen in daz selbe himilriche .
0,486 dar mohte der riche .
0,487 chomen im selben saelichen .
0,488 wolde er die gewinne .
0,489 teilen durch die minne .
0,490 den urostigen solde er bewaeten .
0,491 den hungerigen nerigen .
0,492 er solde den siechen .
0,493 mit sinem guote suochen .
0,494 wisen den blinte- .
0,495 unde leren den tumben .
0,496 uasten die zite .
0,497 die man im gebiete .
0,498 die uiere began .
0,499 die dar zuo schulen gestan .
0,500 sinen zehenten willichlichen geben .
0,501 er selbe christenlichen leben .
0,501a sinen ebenmenscen minnen
0,502 der werlde guotes gunnen .
0,503 deheinen meineit sol er swerigen .
0,504 daz unreht sol er werigen .
0,505 div goteshovs sol er zieren .
0,506 den ewarten eren .
0,507 der uns div goteswart sol leren .
0,508 da mite mugen die richen . alle .
0,509 chome- in die ewigen zelle .
0,510 Wande hie teilte ein hovsherre .
0,511 sinen richtuom uil uerre .
0,512 undir sine chnehte .
0,513 die dienen im mit rehte .
0,514 Des schazzes sint funf phunt .
0,515 der ist got wol chunt .
0,516 wand er uns selbe gegeben hat .
0,517 da unsir dinch an stat .

0,518 Daz erste phunt daz wir gehoren .
0,519 daz schulen wir immir ze got cheren .
0,520 wan er ist milte unde guot .
0,521 unde uns ie genade da mite tuot
0,522 Daz ist daz ander phunt . daz wir daz lieht han .
0,523 daz wir die rehten wege da mite schulen gan .
0,524 wande er uil rehte wege gat .
0,525 der uns daz lieht uerlihen hat .
0,526 mit deme schulen wir uns began .
0,527 daz wir uil rehte geuaren .
0,528 Daz ist daz dritte phu-t . daz wir stinchen .
0,529 des schulen wir uns wol bedenchen .
0,530 ez ist umbe die gebe so getan .
0,531 div sol gewarheit han .
0,532 mit aller slahte reinen .
0,533 so mach si wol guot sin .
0,534 Gan wir fur einen fovlen hunt .
0,535 wir uerwinten die nase ioch den munt .
0,536 also schulen wir uns alle .
0,537 winten uon der helle .
0,538 div stinchent wirs danne der hunt .
0,539 da uor uerwinten wir den munt .
0,540 div stenche uor der helle .
0,541 div cholet uns alle .
0,542 der si beslozen hat .
0,543 der getuo unsir rat .
0,544 der ware gotes sun .
0,545 mit sin selbes zeswon .
0,546 Daz ist daz uierde phunt . daz wir den smach han .
0,547 wol mugen wir uns enstan .
0,548 daz man in den lichnamen tuot .
0,549 wedir ez ist ubil ode guot .
0,550 wande der munt wol enstat
0,551 welich suozze ez hat .
0,552 daz sint uier phunt .
0,553 daz ist ein schone gesunt
0,554 Daz funfte phunt ist uerlazzen .
0,555 an den henden unde an den fuozzen .
0,556 daz wir die wol mugen ruoren
0,557 swar wir wellen cheren .
0,558 Mit den funf sinnen
0,559 schulen wir gewinnen .
0,560 den ewigen lip
0,561 ez si man oder wip .
0,562 Daz sage ich iv rehte wie ez stat
0,563 swer des guotes nine hat .
0,564 der bette mit sinem rate
0,565 unde mit sinem muote .

0,566 unde wrche im drate
0,567 mit handen genote .
0,568 unde habe ze got uil guoten willen
0,569 unde ile den mit werchen erfullen .
0,570 Der tivre paulus .
0,571 der leret uns sus .
0,572 uns ratet ysaias .
0,573 daz wir cherigen daz hus .
0,574 ob got dar zuo chome .
0,575 daz im dar inne gezeme .
0,576 wir schulen got furhten unde minnen .
0,577 so mugen wir sin hulde gewinnen .
0,578 Vnde uolgen ovch des uil tivre- sinnes
0,579 sancti Johannis .
0,580 Vnde tuon sam der edil are .
0,581 der da sweimunde uare .
0,582 so in daz altir an gat .
0,583 daz er daz geuidere lat .
0,584 so ist er alt .
0,585 so ist er chalt .
0,586 er uellet in einen walt .
0,587 uon dem paradiso er gat .
0,588 da sin trost gar an stat .
0,589 er gahet z einem brunne .
0,590 er badet sich dar inne .
0,591 im waehset sin geuidere .
0,592 er ulivget hin widere .
0,593 mit michiler chrefte .
0,594 ovf in die lufte .
0,595 e er immir chome hin widere .
0,596 im sunkit sin giuidere .
0,597 div ovgen sint im also lieht .
0,598 des en habet er e nicht .
0,599 so habet der are edele .
0,600 ein schonez gevidere .
0,601 schoner danne ez e . was .
0,602 der bezeichent daz .
0,603 daz div brovt so wol gebadet wart .
0,604 do si vuor an die uart .
0,605 daz bezeichent uns alle alte unde iunge .
0,605a an der wandelunge
0,606 so der man geualle .
0,607 niene er hie twelle .
0,608 er schol im einen han erkoren
0,609 der obenan si beschoren .
0,610 der uil geistlichen uare .
0,611 unde gahe dare .
0,612 unde sage allen den rat .

0,613 den im der getan hat .
0,614 der uns da gerne wil geschenken .
0,615 der genaden erwenten .
0,616 der chan im wol geraten .
0,617 wie er sich da uor behuote .
0,618 Der bilede der sint drie .
0,619 einiv ist gezalt zuo dem chuphir unde zuo dem blie .
0,620 einiv heizzet silberin .
0,621 daz lat die bezzeron sin .
0,622 div dritte ist guldin .
0,623 daz lat die heristen sin .
0,624 Daz sage ich iv rehte wie ez stat .
0,625 der die chuphirinen bihte da begat .
0,626 der ist in dem riche .
0,627 uil harte werltlichen .
0,628 unz er daz guot genivzzet .
0,629 unde den lip uerulizzet .
0,630 daz er durch got nine git .
0,631 biz er bi dem bettebret gelit .
0,632 so sendet er uil harte .
0,633 nach dem ewarte .
0,634 daz er im gebite .
0,635 unze er getuo sine bihte .
0,636 so der ewart dar chumet .
0,637 unde er sin gechose uernimet .
0,638 so heuet er sin gechose .
0,639 sin chraft div si bose .
0,640 er teilet sin guot .
0,641 dur die michelen not .
0,642 ie deme unde deme .
0,643 ob in daz ende geneme .
0,644 so hat er dannoch den muot .
0,645 also vil maniger tuot .
0,646 ob er z selbe gelebe .
0,647 daz er ir deheinem nine gebe .
0,648 Ich waene daz ist der wille
0,649 der die sele beuelle .
0,650 so scheidet sele unde lip .
0,651 ez si man ode wip .
0,652 swaz er widir gotes hulden hat getan
0,653 er ne mage sich sin niht ergan .
0,654 div bihte div ist chuphirin .
0,655 daz lat die bosisten sin .
0,656 Ich sage iu rehte wie ez stat .
0,657 der die silberinen bihte begat
0,658 der ist in dem riche .
0,659 uil harte werltlichen .
0,660 daz er mit den beinen dar gat .

0,661 da der ewart stat .
0,662 er chovt "herre .
0,663 ich han gesundet uerre .
0,664 widir gotes hulden getan .
0,665 herre ir schult mich bestan .
0,666 sezzet mich in buozze .
0,667 ob mich got leben lazze .
0,668 daz ich uor minem ende .
0,669 gebuozze mine sunde .
0,670 der ewart ist guot .
0,671 wand er z willichlichen tuot ."
0,672 er sezzet in in buozze .
0,673 ubir chleine unde grozze .
0,674 mit fasten unde mit den dingen .
0,675 die er danne mach furbringen .
0,676 er heizzet in daz haben unz an sin ende .
0,677 buozzen wol sine sunde .
0,678 div bihte ist silberin .
0,679 daz lat die bezzoren sin .
0,680 Daz sage ich iv rehte wie daz stat .
0,681 der die guldinen bihte da begat .
0,682 swie der man gesundot .
0,683 der ez enzit tuot .
0,684 mit waltundir hende .
0,685 der mach wol lesken sine sunde .
0,686 unz er habet sin guot .
0,687 der sine bihte wol tuot .
0,688 mit werchen ioch mit Worten .
0,689 dem gewihten ewarten .
0,690 und er lip und guot .
0,691 ze gotes dieneste tuot .
0,692 div bihte ist guldin .
0,693 daz lat die spangen sin .
0,694 die div brovt an ir haete .
0,695 also scone an ir waete .
0,696 Daz golt uil ziere .
0,697 daz bezeichent die bihte also here .
0,698 div wiere dar inne
0,699 bezeichent die waren minne .
0,700 die daz mennisch ze got hat .
0,701 so ez an rehten riwen stat
0,702 uor sinem ende .
0,703 ubil alle sine sunde .
0,704 Swer die bihte hat getan .
0,705 der mach uolichen gan .
0,706 da div werlt elliv sol uor got stan .
0,707 der wirt da genant daz gesegent chint .
0,708 so si uor got saelich sint .

0,709 Swelher so tuot der lernot .
0,710 daz er daz wort garnot .
0,711 da der ware brovtegovm da chumet .
0,712 unde sine gemahelen zuo im nimet .
0,713 da nimet er die erwelten .
0,714 in furhtent die uertwelten .
0,715 wndirlich sere .
0,716 tages habent si niht mere .
0,717 da lat got manege urovwen .
0,718 sine wnden schovwen . in
0,719 sinem heizmuote .
0,720 berunnen al mit blute .
0,721 z allen uieren enden .
0,722 in fuozzen ioch in henden .
0,723 einen stich durch sine situn . wir
0,724 sehen in allen blutun .
0,725 den er durch uns erliten hat .
0,726 da div werlt engegenwert stat .
0,727 Div urowe ist nie so here .
0,728 si en furhte ir da uil sere .
0,729 der herre ist nie so riche
0,730 er ne furhte im uraislichen .
0,731 da stat der ewarte
0,732 er furhtet im uil harte .
0,733 da riwet die sunaere .
0,734 daz si ie wrden ungehore .
0,735 da rihtet got rehte .
0,736 dem herren ioch dem chnehte .
0,737 der vrouwen ioch der diwe .
0,738 also si habent riwe
0,739 mennechlich nach sinem gewrhte .
0,740 da mugen wir uns balde furhten .
0,741 Ein urlivge do ergat
0,742 da disiv werlt nu lange ane stat .
0,743 daz die ubermutigen ritent .
0,744 unde mit den armen stritent
0,745 unde die wellent uerstozzen .
0,746 unde daz durch nieman lazzent .
0,747 werden wir wol da gesunderot .
0,748 daz weiz got .
0,749 da got sinen uluoch tuot .
0,750 da uellet er den hochmuot .
0,751 daz sin wirt dehein gewaht .
0,752 da zergat tage unde naht .
0,753 allez geliche .
0,754 wan daz gotesriche .
0,755 Do daz taeidi-ch zergat .
0,756 dehein gebet ferre stat .

0,757 den got da uerteilet .
0,758 unde in der uiant geseilet .
0,759 daz chan nieman erlesen .
0,760 wie der deheiner sol genesen .
0,761 die uarent ze der gotes winstir .
0,762 in eine michil uinster .
0,763 die muozin immir durch not .
0,764 bovwen den ewigen tot .
0,765 oi a hoi wie der uert .
0,766 der ze der gotes zeswen wirt geschert .
0,767 der uert die heren gotesuart .
0,768 so er ie saelich wart .
0,769 daz si man oder wip .
0,770 der ie gewan den lip .
0,771 daz er danne muoz sin .
0,772 immir in gote%os mendin .
0,773 da horet sin zunge .
0,774 die rehten mandunge
0,775 da sin wir erst heim chomen .
0,776 so wir ez an den buochen han uernomen .
0,777 Daz wizze gewaete
0,778 daz div brovt an ir haete .
0,779 daz bezeichent daz wir e
0,780 muozzen werden wizzer danne daer sne .
0,781 e wir in daz gotesrich mugen chomen .
0,782 daz han wir diche wol uernomen .
0,783 der da uellet ovf die hohen berge .
0,784 daz ist ein michil sorge .
0,785 den der sne da nindir beulivget .
0,786 wand uns daz buoch niemmir livget .
0,787 Nv han wir alle erchennot .
0,788 umbe daz leben unde umbe den tot .
0,789 nu mugen wir wol mit eren .
0,790 an die gotes muotir cheren .
0,791 Daz div brovt da fuor in der uare .
0,792 unde si lovhte ubir alle die schare .
0,793 als ein lichtir tagedesterne
0,794 daz si si leiten so gerne .
0,795 daz bezeichent die heilige maget .
0,796 als uns daz buoch hat gesaget .
0,797 daz si uon eine- edelen chunne wart geborn .
0,798 unde uz allen wiben wart erchoren .
0,799 unde ovch siv liehte schein .
0,800 danne der gotes engel dehein .
0,801 Daz si so wol sunen .
0,802 do si sie heim brungen .
0,803 daz bezeiche-t daz der gotesman .
0,804 niht gemaiton sol stan .

0,805 der sol ie singen .
0,806 daz lop ze got bringen .
0,807 Die heimwarten livte .
0,808 die da wartoten der der brovte .
0,809 die bezeichent die funf werlt alle .
0,810 die da waren in der helle .
0,811 die dannen nie mohten chomen .
0,812 e si got selbe da muose nemen .
0,813 Der uil riche herre .
0,814 uf dem gebirge uerre .
0,815 der sine chnechte uerswief .
0,816 in daz apgrunde tief .
0,817 unde si da habete uerlorn .
0,818 do wolde er werden ane zorn
0,819 Da tet got als ein uogil tuot .
0,820 der ist ime also gemuot .
0,821 so er sin iungide gebirt .
0,822 unde daz boslich wirt .
0,823 hoi wie leide im danne gescihet
0,824 swenne er ez also swarzziz gesihet .
0,825 selbe tuot er im den tot .
0,826 des chumet er in michil not
0,827 so er danne uil wol enstat .
0,828 daz er uil ubil da getan . hat .
0,829 selbe laet er sin bluot .
0,830 daz im also we tuot .
0,831 ez bewillet der uogil guote .
0,832 mit sin selbes bluote .
0,833 unz er iz andirstunt gebirt .
0,834 daz ez schonir wirt .
0,835 danne ez e do waere .
0,836 do er z e uon erste gebaere .
0,837 unde lat ez danne hin widere .
0,838 undir sin geuidere .
0,839 in sin heiz gebruote .
0,840 daz tuont die sine guote .
0,841 Also tet got der riche . uns
0,842 allen geliche .
0,843 do er des ze dem gedahte .
0,844 daz er uns ze dem liehte brahte .
0,845 er lech uns allen den rat .
0,846 des er guot stat hat .
0,847 ob wir rehte gefuoren .
0,848 daz wir herore waeren .
0,849 danne der engil dehein .
0,850 den ie div sunne beschein .
0,851 den hiez er betten an den man .
0,852 den er erste bilden began .

0,853 an den herren Adamen .
0,854 uon dem wir alle chomen .
0,855 Do chom des uiandes rat .
0,856 unde geschante sine hantgetat .
0,857 daz wir do ane viengen .
0,858 sin gebot ubirgiengen .
0,859 do ne habeten wir sin ere
0,860 do ne ruohte er unsir mere .
0,861 So chert er abe sinen muot .
0,862 also noch der riche man tuot .
0,863 der herre des armen hat rat .
0,864 er ne ruochit wie ez umbe in stat .
0,865 unde ovch der arme ubirgat
0,866 des richen herren rat .
0,867 e . sich do got uerdahte .
0,868 unde uns uon erste fure brahte .
0,869 zuo der nuwen unser armuote .
0,870 do erbarmot ez im in note .
0,871 daz wir alle dulten den tot .
0,872 do lost er uns durch sin not .
0,873 er edile unde er uil guote .
0,874 mit sinem uil heren bluote .
0,875 lost uns got der guote .
0,876 alle geliche .
0,877 uon div sol der arme .
0,878 den richen noch erbarmen .
0,879 Ich sage iv wie er z an uie .
0,880 do er unsir erste genade geuie .
0,881 do hiez er im einen sinen trovt .
0,882 weruen ein brovt .
0,883 er hiez in gesprechen eine maget .
0,884 daz was da uor gewissagit .
0,885 div des wert waere .
0,886 daz si den gotessun gebaere .
0,887 ob div maget taete .
0,888 des si der engil baete .
0,889 daz si daz chint gebaere .
0,890 daz da mite uersunet waeren .
0,891 die engil unde div lovte .
0,892 mit der gotesbrovte .
0,893 Daz was der angil unde der list .
0,894 daz geborn wart christ .
0,895 daz er die tofffe enphiench .
0,896 unde uns manich guot bilede uor begiench .
0,897 manege Diemuotin .
0,898 daz wir alsam taetin .
0,899 ER mohte riten ein Ros .
0,900 daz in truoge berch unde mos .

0,901 einen esil er ubirscreit
0,902 do er in Jerusalem reit .
0,903 in die heristin stat
0,904 div undir dem himele ie gelach
0,905 do er riten zuo began .
0,906 manich wip unde man .
0,907 sanch do dem maren .
0,908 die die heristen waren .
0,909 Daz was an einem donerstach .
0,910 der nahist der do gelach .
0,911 sine marter er in do seite .
0,912 als er den willen heite .
0,913 Vndir sinen iungiren da wart ein strit .
0,914 er undirrihte si sin sit .
0,915 si redeten albesundir .
0,916 si naeme michil wnder
0,917 die da hin zze himele fuoren .
0,918 welhe under den die heristen waeren .
0,919 Got hiez si sitzzen .
0,920 er undirrihte si des mit wizzen .
0,921 daz wazzir er selbe dar truoch .
0,922 da er in die fuozze mit dwoch .
0,923 die fuozze ioch die hende .
0,924 er truchenot si mit sinem gewande .
0,925 alle besundir .
0,926 do nam si michil wndir .
0,927 umbe waz got taete .
0,928 die starchen divmuote .
0,929 got in do seite .
0,930 umbe waz er z getan heite .
0,931 Got sprach selbe durch sinen munt .
0,932 er taete in allen chunt .
0,933 “daz ich daz wazzir iv han getragen .
0,934 unde iv die fuozze han gedwagen .
0,935 unde mich sus nidere han getan .
0,936 unde uor iv so dienunde gan .
0,937 des scol ich in dem himilriche den grozzisten lon han .
0,938 unde han iz iv z einem bilede vor getan .
0,939 daz ir alsam schult began .
0,940 Swer dort ie ze genaden wil chomen .
0,941 der muoz die smach an sich nemen .
0,942 er muoz die ubirmuot lazzen .
0,943 div wirt hinhindir gestozen .
0,944 swer sich selben durch daz reht uersmaehet .
0,945 der wirt in mines uater riche gehohet .
0,946 IR scult miniv wort tragen .
0,947 unde schult si der heidenschefte sagen .
0,948 die heidenschaft becheren .

0,949 die christenheit si leren .
0,950 wellent ir ez rehte began .
0,951 ich lazze ivch ze iungist for aller miner christenheit stan .
0,952 unde lazze ivch wesen z ware .
0,953 ir urtailaere .
0,954 ubir div zwelf chunne .
0,955 der Jacobis chinde .”
0,956 Sine iungere er gelerte .
0,957 wie wol er daz becherte .
0,958 Ich weiz er mit in gemerte .
0,959 der martir er do gerte .
0,960 an daz chrovzze er do geflovch .
0,961 da er den tieuil ane bertrovch .
0,962 der sich in daz paradisum want .
0,963 da er einen bovm uant .
0,964 dar inne z einem angen .
0,965 gelich einem slangen .
0,966 Da zebrach er den ban .
0,967 an dem allerersten man .
0,968 unde an sinem wibe .
0,969 er beualchte ir libe .
0,970 ein obiz er ir bot .
0,971 dar an enphiench si den tot .
0,972 daz obiz si ezzen began .
0,973 si befalcte ez dem man .
0,974 da zebrachen si daz gebot .
0,975 daz in getan haete got .
0,976 Da lazzen wir die rede stan .
0,977 daz wart do alliz an dem heren chrovzze widirtan .
0,978 do diu not der martir an giench .
0,979 da er uns in sin genade geuiench .
0,980 dar an chos er den tot
0,981 diu erde erbidimot .
0,982 in uil maneger ende .
0,983 unz in daz apgrunde .
0,984 finstir waert daz sunne licht .
0,985 daz ne was wndirs niht .
0,986 Dar nach fuor er eine heruart .
0,987 so nie deheiniv tivror wart
0,988 er fuor zuo der helle .
0,989 er brach die chole alle .
0,990 die tivre sich entsluzzen .
0,991 die grintil dannen schuzzen .
0,992 div helle wart ovf getan .
0,993 man sach manegen man stan .
0,994 manich wip in note .
0,995 die erlost got der guote .
0,996 div helle wart berovbot .

0,997 der uiant getovbot .
0,998 michil mere
0,999 danne er e waere .
0,1000 Im wart sin menege benomen .
0,1001 sin rehtir meister was chomen .
0,1002 der in uon erste uerswief .
0,1003 in daz apgrunde tief .
0,1004 nidir in die helle .
0,1005 und die sine alle .
0,1006 uon dem chore .
0,1007 die tolen engele .
0,1008 die da rieten an got .
0,1009 des wart in . wol gelonot .
0,1010 si uielen eben alle .
0,1011 dri tage uolle .
0,1012 so diche so der regen tuot .
0,1013 si worhten ubil oder guot .
0,1014 si muosen eben alle .
0,1015 dulten die helle .
0,1016 daz waz div Luzzifern uart .
0,1017 so im ie we wart .
0,1018 Hei a hei wie leide im do wart .
0,1019 do got in die helle sprach .
0,1020 ze dem allersten . man .
0,1021 den er bilden began .
0,1022 benamen er in do nante .
0,1023 der tivel in wol erchante .
0,1024 er sprach uil schiere .
0,1025 got in der helle waere .
0,1026 do sprach drate her Adam
0,1027 dem sine schulde habete getan .
0,1028 in dem obeze den waren tot .
0,1029 der stunt tieffe in der helle not
0,1030 “Her min liebir herre .
0,1031 ich getrovwe dir iemmir vil uerre .
0,1032 nu hilf mir got der guote .
0,1033 uz der starchen note .”
0,1034 Got hiez in ovz uaren .
0,1035 unde svochen Abrahames barn .
0,1036 er lie da nieman bestan .
0,1037 des er deheine ruoche wolde han .
0,1038 er loste si eben alle .
0,1039 mit gewalte uon der helle .
0,1040 die rehten unde die guoten .
0,1041 die sinen willen ie getaten .
0,1042 die helle besloz er .
0,1043 die ander da liez er .
0,1044 Daz was ein schoniv heruart .

0,1045 da div helle berovbet wart .
0,1046 da got die sine chnechte .
0,1047 brahte zuo ir rehte .
0,1048 ze siner brovtlovfte .
0,1049 mit siner martir er si chovfte .
0,1050 er fuorte si eben alle .
0,1051 hin in die heren zelle .
0,1052 Die hermuoweden lovte .
0,1053 die chomen mit der brovte .
0,1054 daz sint die zwelf Salute .
0,1055 mines trohtines trute .
0,1056 unde andir martiraere .
0,1057 edil unde here .
0,1058 die durch daz goteswort .
0,1059 wrden gemartiroet .
0,1060 die werdent z alleroberist gesezzet .
0,1061 ir martir wol ergezzet .
0,1062 Nv wirt ovc nimmir mere .
0,1063 dehein brovtlovft so here .
0,1064 wan disiv nimmir mere zergat
0,1065 unde immir ewich stat .
0,1066 Nv sint geistliche lovte .
0,1067 gezalt ze der selben brovte .
0,1068 w[...][...] zu den geisten .
0,1069 wir solten sin meister
0,1070 wan wir sin genant div gesegent chint
0,1071 unde uf uns iene wartunde sint .
0,1072 die uor uns dannen sint genomen .
0,1073 unde hin ze den gesegenten chomen .
0,1074 die wartent uns unz an den suontach .
0,1075 so wol in der dar chomen mach
0,1076 swer daz reht begat .
0,1077 daz ze den selben ziten da bestat .
0,1078 dem ist si also edil unde also here
0,1079 so dem allersten z ware .
0,1080 Nv beschirme uns got alle .
0,1081 uor der siechen helle .
0,1082 unde uersperre uns uor der helle munt .
0,1083 unde mache uns an der sele gesunt .
0,1084 daz er unsir uatir werde .
0,1085 in dem himil unde in der erde .
0,1086 Sit er uns ze sinen chinden hat genomen .
0,1087 daz ovch wir in sin rich muozzen chomen .
0,1088 wan wir uon im haben den atem .
0,1089 daz werde war amen .